

中國方志叢書・華北地方・第一〇一號

據民國潘龍光等修張嘉謀等纂影印
民國二十七年鉛印本

河南省

西華縣續志
(二)

成文出版社印行

中華民國五十七年八月臺一版

西華縣續志

全二冊

定價：新台幣七二〇元正

發行人：黃 成 助

臺北郵政信箱二二六〇五號

出版者：成 文 出 版 社

臺北郵政信箱二二六〇五號
電話：九二二〇一〇號

印刷者：正 大 印 製 廠

三重市長生街二號之一

內政部登記證內版臺業字第一一四七號

版權所有

西華縣續志卷十

藝文志

周文秦火漢理其燼劉向父子校而奏其七略班氏因之以志藝文維時西華著作尙未有紀自潁子嚴春秋左氏條例始著范書第考其時已在漢季前此大師宿儒著作之林必不乏人卽如潘元貞世講詩易教垂泮宮見於校官之碑固當斐然有述而不少概見則袁山松之書不傳而范曄司馬彪之倫不續藝文之咎也宋元嘉中長平殷淳在祕閣本荀勗李充之舊撰四部羣書目四十卷梁天監時殷鈞又撰四部書目錄四卷雖繁簡不同而不可偏廢淳書今不得而見矣隋志謂爲敍錄度必條析源流甄校同異實爲後世提要之祖鈞錄散見隋書經籍志志所謂梁有者大抵皆爲鈞舊古書之不盡亡由隋志之能詳抑亦鈞錄簡明易於流傳有以助成之其後唐開元間詔修羣書四錄殷踐猷再領經部與其從弟承業是正文字始終其事兩唐書藝文志實基於此雖殷氏傳其家學然自隋唐訖今二千年經籍藝文分別部居終未踰其範圍以一邑一門之著述爲神州藝林之津逮則謂四部目錄之學世在長平非侈論也舊志藝文惟載詩文頗違班法今列入文徵而輯錄縣人所

四庫全書
卷之二
著書爲此志蓋自穎氏條例後如殷仲堪毛詩雜義至張遠覽詩小箋經部之支流也殷亮顏公傳以逮李呈秀世史直筆史部之餘裔也諸子之書傳者較鮮醫方術數或祕不宜疇人哲匠近始萌芽諸家惟儒最著其他大都皆以集名矣獨惜憂患迭更五陋互乘網海搜山不能滿曩時一家之部目卽此所載亦或有錄無書後顧茫茫更恐並此而失之兵火流離潦草編此不敢復守淳鈞鴻綱而用近時著者書目之例以書繫人其所著兼數部者仍依殷氏四部分類次第統古今爲一編而以穎氏春秋條例冠首

春秋釋例十卷

漢穎容撰後漢書容傳著春秋條例五萬餘言釋文敍錄作條例隋經籍志作春秋釋例十卷新唐書藝文志同惟十卷作七卷鄭樵通志春秋條例門卷數與隋同按杜預春秋左氏經傳集解序云末有穎子嚴者雖淺近亦復名家預以容與劉子駿賈景伯許惠卿同稱其注左則舉劉賈許穎之違以見同異是書爲世重久矣而宋藝文志卽未著錄則鄭氏作通志時未必曾見其書侯康補後漢書藝文志曰按穎氏之例每與劉子駿賈景伯同其書王謨有輯本然杜預釋例所載蕭吉五行大義所引者尙未采也馬國翰玉函山房輯本序曰後漢書儒林傳稱左氏條例隋唐志作釋例書名與杜氏同今佚錄二十七節其全書體例不能詳考

右後漢

殷羨言行

世說政事門注品藻門注並引之後世言行錄昉此按此書久佚文廷式秦榮光補晉書藝文志吳士鑑補晉書經籍志並載此目

殷融集十卷

按融事見殷浩傳謂融與浩口談辭屈著篇融勝隋經籍志別集類晉太常卿殷融集十卷新舊唐書卷數並同鄭樵通載別集門丁國鈞文廷式秦榮光等各補晉書藝文志既列此集又謂融有象不盡意大賢須易論吳士鑑補晉書經籍志據世說新語文學篇注謂融有象不盡意論黃逢元補晉書藝文志丁部亦稱十卷

殷浩集五卷

梁五卷錄一卷隋經籍志別集類晉揚州刺史殷浩集四卷新舊唐書集錄門皆稱五卷宋鄭氏通志同是集隋稱四卷至唐宋又稱五卷豈集本五卷至隋已亡其一而唐宋所稱五卷或兼錄而名之歟浩事績無可稱然有德有言竟出於桓溫之品評當亦爾時公論之不可沒也文廷式補晉書藝文志稱浩集五卷錄一卷秦榮光補藝文志吳士鑑補經籍志黃逢元補藝文志同逢元又云浩本字淵源唐諱淵故晉書浩傳作深源云

殷浩方書

文廷式補晉書藝文志云圖書集成醫部名醫列傳引醫學入門云殷浩精通經脈著方書

殷浩別傳

見秦榮光補晉書藝文志

殷康集五卷

考隋經籍志晉太常卿韓康伯集十六卷下分注梁有吳興太守殷康集五卷錄一卷亡則是書已亡於南北朝之季矣然舊唐書新唐書鄭氏通志暨近代丁國鈞秦榮光補晉藝文志吳士鑑補晉經籍志黃逢元補晉藝文志皆著其集名卷數而不殺豈非昔賢精神所遺故存其名以俟後世歟

殷覲集十卷

覲集見隋志別集類臨海太守辛德遠集五卷下分注集十卷錄一卷亡後來兩唐書皆未著錄宋鄭樵通志略復著殷覲集十卷豈亡佚已久至宋復出歟抑鄭氏愛之而不忍佚其名也宋明藝文志暨清四庫書目皆不載黃逢元補晉書藝文志列南蠻校尉殷覲集十卷錄一卷注云見七錄

殷仲堪文集十二卷

晉書仲堪傳所採諸篇皆辭條豐蔚情文兼茂當時著作之林也梁存十卷錄一卷隋經

藉志稱十二卷並目錄舊唐書集錄新唐書別集門皆稱十卷鄭樵通志略稱十二卷文
廷式補晉藝文志稱集十卷錄一卷吳士鑑補晉經籍志黃逢元補晉藝文志卷數與廷
式同逢元又注云本七錄

毛詩雜義一卷

仲堪撰見隋書經籍志及文廷式補晉書藝文志至吳士鑑補晉經籍志則作四卷

論語注

仲堪撰文廷式補晉書藝文志云皇侃義疏引仲堪說馬國翰輯得九節疑仲堪亦嘗注
論語也按既爲皇侃引據則原有是書無疑但散佚已久或當時並書名亦未見故歷代
不克著錄吳士鑑補晉經籍志作殷仲堪論語解黃逢元補藝文志作論語注

常用字訓一卷

仲堪撰晉代著作訓詁絕少仲堪去漢未遠其字訓當尙近古梁著錄一卷隋經籍志收
列小學類見要字苑一卷下分注通志略亦稱一卷吳士鑑補經籍志黃逢元補藝文志
卷同逢元注云見七錄又云元按顏氏家訓書證篇云殷仲堪常用字訓亦引服虔俗說
雜論九十五卷

仲堪撰是書隋經籍志未著錄舊唐書經籍志丁部集錄列九十五卷新唐書雜家類列論集九十六卷總集類列雜論九十五卷豈仲堪有論集九十六卷復有雜論九十五卷乎意或本係一書而新唐書兩類並收觀其但爲一卷之差其或別列之本附載他文亦未可知通志略未收豈爾時已佚歟文廷式補晉書藝文志作論集九十六卷吳士鑑補經籍志作雜論九十五卷黃逢元補藝文志作論集九十六卷

雜集一卷

仲堪撰見隋經籍志總集類文廷式黃逢元各補晉書藝文志

策集一卷

仲堪撰見隋經籍志總集類文廷式補晉書藝文志

殷荊州要方一卷

仲堪撰丁國鈞秦榮光黃逢元等所補晉書藝文志吳士鑑所補晉書經籍志俱列殷荊州要方一卷國鈞逢元俱注云見七錄逢元又云案仲堪父病積年衣不解帶躬學醫術書殆成於此時

殷仲文集七卷

謝靈運云若殷仲文讀書半袁豹則文采不減班固仲文才藻早有定評隋經籍志別集類列晉東陽太守殷仲文集七卷分注梁五卷隨較前又增二卷當由愛其文者集而增益之也舊新兩唐書通志略卷數並與隋同丁國鈞秦榮光補藝文志作七卷吳士鑑補經籍志黃逢元補藝文志作五卷逢元並注云本七錄今存嚴輯本

孝經注解一卷

殷仲文撰按隋經籍志集議孝經一卷下分注內有東陽太守殷仲文晉陵太守殷叔道各注孝經一卷舊唐經籍志新唐藝文志通志略文廷式補晉書藝文志吳士鑑補晉書經籍志黃逢元補晉書藝文志皆列目文廷式注云邢昺正義引此書三節馬國翰玉函山房集錄逢元注云邢昺孝經正義開宗明義章五刑章引存

又一卷

殷叔道撰與仲文注並見隋經籍志兩唐書及通志略文廷式吳士鑑黃逢元各補志惟隋作晉陵太守冊府元龜作東陽太守黃逢元注云按經義考殷仲文孝經注引冊府元龜云殷叔道爲東陽太守注孝經一卷爲仲文注孝經之證似叔道卽仲文字考今晉書仲文傳字不詳亦不言晉陵太守世說言語篇注引續晉陽秋殷仲文卽字仲文則叔道

當別爲一人卽以梁錄引書次第證之一題東陽太守一題晉陵太守叔道與仲文晰爲兩人又明確據此則稱叔道東陽太守暨與仲文爲一人者誤

殷叔獻集四卷

叔獻名見殷覲傳兩兄覲叔文並顯而隋經籍志別集類稱晉聘士殷叔獻集四卷殆未應朝命歟叔獻文本三卷梁及兩唐書卷數同通志略稱四卷殆與隋書並其目錄而計之歟丁國鈞補藝文作集三卷錄一卷吳士鑑補經籍黃逢元補藝文卷同秦榮光補藝文作集四卷錄一卷

殷允集十卷

隋經籍志別集類庾肅之集下分注梁有太常殷允集十卷亡兩唐書通志略皆稱十卷文廷式秦榮光吳士鑑黃逢元各補志卷數同章學誠氏隋經籍志考證引世說賞譽篇注中興書曰允字子思太常康第六子恭素謙退有儒者之風又御覽通典書鈔類聚允有石榴賦與徐邈書杖銘祭徐孺子文

殷氏譜

文廷式補晉書藝文志曰世說文學門注殷氏譜曰仲堪娶琅琊王臨之女字彥英紕繆

門注殷氏譜曰殷師字師子至驃騎諮議生仲堪任誕門注殷氏譜曰義字洪喬仕至豫章太守按世說注所行陰氏譜兼載婦人矣

殷氏世家

秦榮光補晉書藝文志云御覽學部引

四部書目序錄四十卷

殷淳撰宋書云淳在祕閣撰四部書目凡四十卷行於世不言序錄然志書目至四十卷之多其有序錄可知新唐書目錄類淳四部書目序錄三十九卷宋史藝文志不載蓋佚久矣

婦人集三十卷

隋經籍志婦人集二十卷下分注曰梁有婦人集三十卷殷淳撰夫既爲婦人集則非淳著而爲彙集他人之作矣彙婦人集至三十卷可爲大觀惜其散逸不見於後世也新唐書藝文志列入總集類卷數同

殷淳集三卷

前兩書皆淳彙錄總集之書此則當爲淳之自作也隋經籍志別集類宋給事中丘深之

集分注殷淳集二卷兩唐書通志皆稱三卷豈後又有附益歟

殷曠之集五卷

曠之仲堪季子史稱其有父風隋經籍志分注引梁云晉中軍功曹殷曠之集五卷晉書傳云曠之仕至剡令隋志稱爲中軍功曹曠之殆兼歷斯職與丁國鈞文廷式秦榮光吳士鑑黃逢元各補志皆作五卷

殷景仁集九卷

史稱景仁學不爲文敏有思致口不談義深達治體觀傳所載良然意景仁經綜之林尤多深謀密計所以受知當時而劉湛等終爲所翦去也隋經籍志宋給事中丘深之集下分注揚州刺史殷景仁集九卷亡鄭氏通志卷數同章學誠補隋經籍志引嚴氏全宋文編曰景文名鐵以字行元嘉十九年卒有集九卷宋書本傳有辭侍中表章太后生母蘇氏喪禮議各一篇廣弘明集有文殊像贊一篇文殊師利贊一篇

殷琰集八卷

琰事載宋書琰詳南史較簡琰在壽陽爲杜叔寶等所擲掄行事多戾然史載琰少以名行見稱又在壽陽被圍多所懷附意優於文而權不足者琰雖拒命積時後王景文蔡興

宗等尙與友善是當時已諒之矣志其集亦不廢言之義也隋經籍志載琰官太子中庶子集七卷兩唐書鄭氏通志稱八卷未詳其故也

梁天監六年四部書目四卷

殷鈞撰前殷淳撰宋四部書目三十九卷茲稱四卷蓋專記書名之書也蕭梁極重文學此書收采較宋時爲多然兩書皆不可見實爲憾事鄭氏通志收入總目門卷數同

小說十卷

殷芸撰按芸傳不記此書隋經籍志小說十卷下分注云梁武帝勅安右長史殷芸撰則亦官家之書矣又云梁目三十卷則至隋已迭其二十卷也由梁以前小說殊少自唐以後不可勝紀矣兩唐書鄭志皆稱十卷

右晉至梁

殷英童集三十卷

英童事不見史籍顏魯公顏勤禮碑有口口大夫殷英童宋恂乾隆志云北齊殷英童善楷隸兼工畫今按英童有集三十卷則以非專工書畫矣舊新兩唐書皆列別集門卷同

殷問禮集十卷

見舊唐書卷四十七經籍志亦見新唐書卷六十藝文志但舊書經籍志稱十卷至新書藝文志第存一卷也史稱問禮書妙於父問禮父名已佚修新唐書時問禮集已佚去十分之九僅存之一其能久存乎惟問禮武德中兼弘文館學士與修梁史固當時文學之選云

樂府新歌二卷

殷僧首撰按僧首殷不害子留居長安終迎不害以入關者原陳郡人也隋經籍志著僧首官秦王司馬列總集類斯亦彙集之書矣鄭氏通志收入樂類歌辭門

羣書四錄二百卷

殷踐猷等奉勅撰唐書儒學馬懷素傳云開元初有詔勾校祕書是時文籍盈漫皆哀朽蟬斷籤牘紛舛懷素建白願下紫薇黃門召宿學巨儒就校謬闕又言自齊以前舊籍王儉七志已詳請探近書篇目及前志遺者續儉志以藏祕府詔可卽拜懷素祕書監乃詔國子懷士尹知章四門助教王直直國子監趙玄默陸渾承吳綽桑泉尉韋述扶風丞馬利徵湖州司功參軍劉彥直臨汝丞宋辭玉恭陵丞陸紹伯新鄭尉李子釗杭州參軍殷

踐猷梓潼尉解崇質四門直講余欽進士王愜劉仲丘右威衛參軍侯行梁邢州司戶參軍袁暉海州錄事參軍晁良左率府胄曹參軍母昶滎陽主簿王灣太常寺太祝鄭良金等分部撰次踐猷從弟祕書丞承業武陟尉徐楚璧是正文字懷素奏祕書少監盧備崔沔爲修圖書副使祕書郎田可封康子元爲判官然懷素不善著述未能有所緒別會卒詔祕書官並號修書學士草定四部人人意自出無所統一踰年不成有詔右常侍褚無量大理卿元行冲考紕不應選者無量等奏修譌有條宜得大儒綜治詔委行冲乃令昶述欽總緝部分踐猷愜治經述欽治史昶彥直治子灣仲丘治集八年四錄上之學士無賞擢者行冲知麗正院又奏紹伯利徵彥直踐猷行果子釗直昶述灣玄默欽良金與朝邑丞馮朝隱冠氏尉權寅獻祕書省校書郎孟曉楊州兵曹參軍韓覃王嗣琳福昌令張俳進士崔藏之入校麗正書由是祕書省罷譌緝而學士皆在麗正矣按懷素傳所載四錄之修先懷素後行冲而踐猷前後皆與其事又與王愜治經則是書之成不爲無力矣固非殷氏一家之述作然亦非懷素行冲輩所得擅也故列書名於篇而節博素傳於下且亦見古來大著作皆由集思廣益非一家所得私云兩唐書鄭志卷數並同

顏公傳二卷